



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim




tir_yimyim



tir yimyim

TAPAK 3



Trump indang envoy-i Russia Tir
Putinden senden amen

India ya shishilembaba partner
tajung ka masü: Donald Trump



VOL. XXII ISSUE NO. 293 (ADOK 293)

DIMAPUR

YANGTEPNÜ (THURSDAY)

LUROI (LUROI) 07, 2025

₹ 5.00

DMCEWU longkak aitba anenogo

Dimapur, Luroi/August 06 (TYO): Itasen aser danga teyari magütsü aliba ajunga agütsütsü ta Dimapur Municipal Council indang CEO Thungchanbemo Tungoe-i tezüluba nung agütsüba sülen Dimapur Municipal Council Employees' Welfare Union (DMCEWU) longkak ait tenzüker anogo ana buba nung anenogo.

Tanü iba ken o jembia executive senden ka amenba nung longkak aitba anentsü telemtetba ya agi, ta Union ajanga ashi.

DMC iindang CEO-i ita asem itasen ya August 20 tashinung agütsütsü aser employess benefits tem October tashinung bentettsü ta shia liasü. Paise September ita tashinung DMC staff tem phase field deployment

yokba maparen tenzüksü ta ashi.

Revenue nung mepetmesü aliba aser tang itasen magütsüba indang inyakyim bentettsü asoshi DMC ajanga core committee ka kumtetogo, kong DMC indang CEO, Chairperson aser Councillors 12 züngsem alitsü.

Nagaland sorkari toll tax collection ajunga nokdangtsü totuyuba agütsüba ajanga DMC nungi revenue aruba nung kanga mejungi kongshi.

DMCEWU ajanga July 24, 2025 nü DMC CEO nem pangzüng ka tezüluba nung agütsüba nung itasen agütsütsü, employee benefits mapang shidak nung agütsütsü aser official duties atema staff shidak lemsatsü khanga liasü.

Nagaland Foothills Road ya Naga nunger ajunga meyong

Dimapur, Luroi/August 06 (TYO): Nagaland Foothills Road Project dak sendakba ken o jembitsü asoshi August 7, 2025 nü Nagaland Chief Minister indang Residential Complex nung senden jazüka alidak Chang, Khiamnuingan, Sangtam, Yimkhuing, Tikhir aser Rengma kin nungi lenirtem mejaokba ajanga temulung yirur aser anisüngzüka meliteter, ta Ao Senden, Ao Senso Telongjem Dimapur, Northern Sumi Community Dimapur, Konyak Union Dimapur, Kuki INPI Nagaland, Lotha Hoho Wokha, Phom People's Union Dimapur aser Zeliang Peoples' Organisation Dimapur telungjem sangdong ka nung ashi.

Asen state tejakleni aotsü aser terenlok asoshi pei agitsü mebilemi shilem tajung agiba ozü tembartem iba Project dak sendakba ken o jembitsü senden ayonga aliba nung mezüngokba kanga jashir, shirnoki küm 13 jungnüa nüktzü aser asentzü yima yaritepa arua lir.

Foothills Road Project ya ali kibur mesüra dangar ta telemsa makai Naga nunger ajunga meyong lir. Anungji Naga nunger kibong telungzüik nung ajak kibur aser iba project nung dangar shinga mali.

Nisung mesüra kin katia iba Project madak kibur akumtsü makok. Tanü Foothills Road ya nisung kar li nung yanglutsü, aser asüng asen state dangi danga project arutsü aser iba atema item ali kiburi kibur akumtsü makok.

Nagaland Foothills Road ya 2013 küm Nagaland Foothills Co-ordination Committee ajanga shisatetba lir. Iba sülen timtem aser tayongzüka jenti ajuruaka tanü tashi Committee tasü ita nokdaka lir aser iba atema onoki kanga pelar, ta telok ti lungjemer sangdong ajanga ashi.

Foothills Road asangsang

(Maneni tapak 2 nung...)

Sorkari ENPO atema Article balaka maginer; Reservation policy & ILP reprangshir



K. G. Kenye

Kohima, Luroi/August 06 (TYO): Tang ENPO den yimten ken o tejembidak aliba, reservation policy aser Inner Line Permit (ILP) mapa kuma inyakba dak sendakba nung cabinet-i telemtetba agiba aser jangjashiba indang Minister aser Nagaland sorkar indang odongtar K.G. Kenye-i sangdong agüja liasü.

Hotel Japfu, Kohima nung Bodhbar nikongdang osangbener den jembidang, tanü Cabinet senden alidang ENPO-i administrative entity balaka akhangba ken o nunga kongshia liasü, koba Ministry of Home Affairs (MHA) den jembishinüa aruba nung kanga kumtangtsü jenjang ka tongogo, ta Kenye-i ashi.

Centre-i Frontier Nagaland Territory Authority (FNTA) nem Article 370 kübok constitutional article tasen ka agütsütsü onük benokba state sorkari khenyongi memulungi nokdaka arur, ta pai ashi.

Iba ama mera ya agira Nagaland nungi litsü-lika balaka razüka aor amai angatettsü, koba state asoshi khenyongi tamakoktsü, ta pai ashi.

Iba melen state sorkari Assam nung Article 371B kübok autonomous councils aliba mesük Article 371A kübok anepalutsütsü atema jembir, ta pai ashi.

Regional councils nung ex-officio members nem voting

rights agütsütsü benokba constitution den mapet ta tutettsüogo, ta Kenye-i ashi.

"Parnok nem administrative, financial aser judicial autonomy agütsütsü state sorkar mulunga lir, saka tang aliba state den tesendaktep raksatsüsa yimten maitsü balaka adokdaksütsü merangba anema akang-akanga noksaker," ta Kenye-i metetdaksü.

Iba onük nung state tangatetba indang-indanga Union Home Ministry nem agütsütsü asoshi Independence Day sülen Cabinet ajungai Delhi semdangtsü akok, ta pai metetdaksü.

Küm aika tejen reservation policy nung mangatettep aliba indang jembidang, anatsülen nungi takhangba agütsüba - yanglushitsü ajungshiba aser maneni kasa amshitsü ajungshiba indang pai lemsatepa liasü.

State-i tesüiba küm 48 tashi reservation formula kasa amshia arur aser metokmeperi jenti lir, ta Kenye-i ashi.

Sorkar indang data ajanga ashiba agi, sorkar mapa shilem 64 non-backward tribes pongu yagi agia lir aser backward tribes ter yagi tanünga shilem 34 dang agia lir, ta pai ashi.

Iba metokmeperi bentettsü asoshi sorkari Reservation Review Commission ka tentettsü, koba sorkar ketdangtsü mapa nungi anisüngzüka alir kati anir alitsü.

Iba Commission nungya Personnel & Administrative Reforms Department aser Law & Justice Department nungi ketdangtsü ka-ka, Home Commissioner aser Central Nagaland Tribes Council (CNTC), ENPO aser Tenyimi Union nungi teshimtet nübu ka-ka alitsü.

Iba Commission yagi tang aliba system asadangtsü, temelenshi nüngdaka aliba lemsateptsü aser Committee tentetba anogo nungi zünga ita trok tsüngta sorkar nem report agütsütsü, ta Minister Kenye-i ashik.

Ajisüaka January 2026 nung tenzüksü imlaa aliba Centre indang caste census den külemi item recommendations ya mapa kuma amshitsü akok, ta pai ashi.

Inner Line Permit (ILP) dak sendakba nung, state sorkari küm aika shilem kar amshia aruba sülen 'comprehensive ILP mechanism' mapa kuma amshi tenzükogo, ta Kenye-i ashi.

Taoba mapang ILP ya executive order ka ajanga dang amshia aru, saka tangbo 2019 Citizenship Amendment Act ajanga mela aliba ozüng kübok tashi itshiogo, ta ashi.

Dimapur, Chümoukedima aser Niuland district densema arütsülen aliba district tem nung tali temulung agütsü, kong kidanger state Assam nung illegal immigrants meindokba maparen tulu inyakba ajanga tebilemstü akar, ta pai ashi.

Migrant categories lemsatsü aser mapa kuma inyaksü tasa yanglutsü asoshi government sub-committee ka nem nunglokja lir, ta ashi.

Pei aliba tesem nung illegal immigrants tem mita aliba civil societies, village councils aser kaketshir tem dang amalitep akaba aser yaritepba atema pelaba lemsatep aser ILP regime mapa kuma inyakba mapang pei mulungba nung ozüng mamshitsü saka ozüng amshirtem den yariteptsü ayongzüka liasü.

DC dang Tzüla apu tebilemstü dak sentakba nung tezüluba ka agütsü

Mokokchung, 06 Aug (TYO): National Highway 202, Mokokchung - Tuensang lenmang nung aliba Tzüla apu tashi maitba dak sentakba nung Longsa village council-i Mokokchung Deputy Commissioner dangi tezüluba ka agütsüogo.

Zülü nung ashiba agi, iba apu ya 1960s mapang BRO-i yangluba lir, apu kanga tejen asünung kodang ang jireptsü

ashitsü makokba tia ka nung lir. Iba lenmang ya district aika asoshi taküm lenmang lir, aser iba apu ya ton 8 (ti) bentettsü tashi nung dang yangluba lir, anungji, ibai yanglushitsüla aser iba apu ajanga khu tulu bener jajaba gari-temji azüoktsü nüngdaker, ta shia lir.

Oliorartem kümzüksü mechi police-tem yoka iba apu ajanga khu taret abenba garitem ya meita reprangdaksünür, ta Longsa

Village Council Chairman, Akangjungshi Tatar aser Tezülur, Repalepzük GB nadi yokba tezüluba nungji shia liasü.

Iba apu majungba den lenmang tebilemstü dak sentakba nung tawa Longsa yimdak Aug 2 nung Tsüngremmung benjong amungdang, Longsa yimden-i Nagaland Road & Bridges Minister, G Kaito Aye nema tezüluba ka agütsüogo.

Mokokchung Sr. SP-i Temporary Ungma Police Outpost lapoktsü



Mokokchung Sr. SP, Vesupra Kezo NPS-i temporary Ungma police outpost lapoktsür külen, par külem ketdangsürtem aser temeket yimtsüng nungi yimsüsürtem den külemi telok noksa tangokba angur. Mokokchung, 6th August, 2025

Mokokchung, 06 Aug (TYO): Mokokchung Senior Superintendent of Police, Vesupra Kezo NPS-i 6th August, 2025 nü khen atema yangluba 'Temporary Ungma Police Outpost' ka lapoktsüogo. Iba outpost ya Settsü lenjem nungi tatsüka dang pilar National Highway 2 (NH-2) anasa lir. Police Baptist Church DEF Mokokchung Pastor, Temjen-i iba outpost meshiteta sarasademtsü.

Sr. SP, Vesupra-i iba outpost lapokja jembidang, iba ya lapokba ajanga nüburtem kümzüka ayuba den nüburtem den amalitep anasa aruba ka mapa ka asütsü imlar. Iba area nung iba outpost amenoktsüba ya Mokokchung police asoshi talangka nungi pungmanga aliba mapa ka liasü, ta ashi.

Iba area nung küm 3 tsüngta nung ozüng anema inyakba mapa (crime case) 21 tashi ataloka lir, item case balala dak sentakba nung nisung 85 apu aser itemji kar rakzüratempa,

mozümora/yi shibelenba aser gari lendong ajurubatem lir. Item jagi iba tesem nung nübur kümzüka ayutsü outpost nüngdakba sayur, ta paisa kuli kar bener arua lemsatép.

Yangi outpost amenokba nükjidingji rongdak nüngdak/ timtem ajuruba mapang yakta langzütsü, patrolling mapa tajungba akümtsü, ozüng anema inyakba mapa ajema kümdaktsütsü, aser ozüng amshiba yayim tsütsü nüburtem temulung lema aser ayipjangdaktsütsü asoshi lir, ta pai ashi. Iba ya ajanga temeket village council-tem den aser senso nübur den tali tesentaktep nung ozüng anema inyakba mapa nung shilem agitsü imlar, ta paisa shisem.

Iba ya outpost ya bangdak abenba tesem ka dang masü saka ibai nübur tenzüka tesem ka südaktsütsü, senso nübur temeten kümzüka ayuba, tejak mereprangi timi inyaktsü aser nübur nüngdakba mapang yaritetba tesem ka südaktsütsü,

ta paisa metetdaksü.

Iba outpost ya tatishitsü tajung sayuba "model police station" ka südaktsütsü asoshi police kisüngi makoktsü, anungji, nübur nungi tenungitba aser amalitep nüngdaker, ta pai ashi. Paisa Ungma, Settsü, Aolijen, Mangmetong aser Longkhüm yimden nungi maneni teyari nüngdaker, ta mepishia metetdaksü. Nübur dak rangloker pei mapa timi ochishia inyaktsü asoshi paisa police ketdangsürtem ayongzük.

Iba sentong nung Addl. SP, Y. Tumchobemo Yanthan NPS menden liasü. Sentong nung EAC Ongpangkong, Sangpangchang; Ungma village council tenüng nung Imli Imsong tatar; Ongpangkong Mungdang tatong tir, Tinumayang parnokia tepela o den tayongzüka aser inyakdaktsünüba tebilemba balala bener arua lemsatép. Dy. SP (Reserve) Mokokchung, Logubu NSU, NPS-i pelaba o lemsatép.

Bengaluru Nung nung Tsüngremong benjung amung



Bengaluru, Luroi/August 6 (TYO): August 2, 2025 nü Bengaluru nung aliba Aortem Tsüngremong benjung United Theological College, Bengaluru nung atenshia monga liasü. "Sobaliba Rajem" omen nung ajemdaker iba sentong ya Ao Senso Telongjem Bangalore (ASTB) aser Ao Kaketshir Telongjem Bangalore (AKTB) nati longjemmer achayanga aming. Iba tongtipang mongpu ya Bengaluru nung aliba kilen, yimtsü yimbo, wadang balala nung mapa inyakertem, kaketshisatsü bushirtem, lai bushirtem aser keshi kenar tembar tajungtem aika atenshia akümketa mungogo.

Sendong tenzüka sendong lenir-i telok ajak pela agizük aser Dr. Kaholi Zhimomi ajanga sarasadema sentong tenzük.

ASTB Tir Wb. Sunep Longkumer ajanga okila-a sentepa alirtem dang Tsüngremong ratet aser nungtemji metedakja liasü. Omen "Sobaliba Rajem" nung ajemdaker Wt. Lanusenla Longchar-i, tanü tashitemetet aser kara ainba putu ka nung koda asen sobaliba tajungji meima bushitsüla aser iba ya akümtsübua koma wazüka ayutsü iba indang jembia telok ajungshi.

Aoer dak aliba sobaliba takar aser tajungji kenten-menü aser yar tsüngsang ajanga sayaba mapang agia liasü. Sentongtem tarensen kar yamai: Sobaliba ken tajunga ka Wb. Arensunep Lemtor aser Wb. Moa Meyur teloki tena sentepa alirtem ayongzük. Ao students Kristu Jayanti College,

Bengaluru ajanga yar tsüngsang shilem tajung agia liasü. Bengaluru watsütem Wt. Merenla Walling aser Wt. Asenla Naveen lar teloki tetsü tebo ken tajung ka aten. Iba sülen ken tena ar atsütepa mapang agia liasü. Tsüngremong shijep Tir AKTB Wb. Akangnungsang Jamir-i achayanga telok ajak pelatepa shilem agia liasü. Sendong tembanga aser tenungsang agütsüa Wb. Imti Walling Pastor In-charge Bengaluru Ao Baptist Fellowship ajanga sarasadem aser sentong temer telok chiyongba mapang liasü.

Sentong nung atener ajaki shilem tajung agia pei dak aketba sempet, nübu aser rongsen jenti agi yaritepba ajanga sentong tali meraketa takok ma nung mungogo.

Dimapur, Chumo aser Niuland atema awareness sentong ayonger

Dimapur, Luroi/August 6 (TYO): Department of Labour aser ESIC Regional Office, Guwahati na longjemmer Employees' State Insurance Scheme dak sendakba nung awareness sentong ka den repsema angati Medical Health Camp aser Registration Drive ka August 12 nü 11 ako nungi tenzüka Hotel Acacia nung agitsü

Employees' State Insurance Scheme ya Ministry of Labour and Employment, Government of India kübok Employees' State Insurance Corporation (ESIC)-i achayangba Medical Insurance ka lir. Employees' State Insurance Scheme ya Employees' State Insurance Act nung shilem ka lir, koba EMPLOYEES' State Insurance Act 1948 nung shia aliba ama employee tem shirangba, nubentsüba, lemtalemria akümba mapa parnok kümzüka ayutsü aser insure süa aliba nisungtem aser parnok kibongtem nem medical teyari agütsütsü atema lir.

ESI Scheme ya factory nung inyakerkem aser Road Transport, Hotels, Restaurants,

Cinemas, Newspaper, Shops aser Educational/Medical Institutions nung inyakerkem atema lir.

Dimapur, Chumoukedima & Niuland districts kübok item Organisation /Union / Establishment /Institution Proprietor/Employer dang iba Awareness sentong nung parnok kübok inyaker ana mesüra iba dak tali anria arua shilem agitsü metetdaksüogo. Establishments aser employee tem registration atema help desk Registration Service ka lapoktsütsü.

Establishment aser employee tem züngoksemtsü atema tenüngdakba kuli kakettem:

1. E s t a b l i s h m e n t s züngoksemtsü atema a. Employer's PAN card b. Employer's Aadhaar card c. Establishments License Certificate d. Aadhaar registered mobile no. for OTPs e. Employer/establishment bank details
2. Employees tem züngoksemtsü atema a. Employee Aadhaar card b. Employee bank details.

JMCnung Viksit Bharat Yuva Connect sentongagi

Dimapur, Luroi/August 6 (TYO): Jubilee Memorial College Hall, Aongza Ward, Mokokchung nung August 6 nü "Emergency Period in India" omen nung ajemdaker Viksit Bharat Yuva Connect sentong agiogo.

Iba sentong ya Nehru Yuva Kendra, National Service Scheme & Department of Political Science, JMC aser District Youth Resource & Sports Office Mokokchung nung longjemmer ayongzüka agiogo. Sentong nung youth parliament aser debate tetoktepba agia liasü.

Sentong nung Mokokchung Deputy Commissioner Ajit Kumar Verma IAS alakteta jaoker liasü. Pai kaketshirtem dang mepetmesü balala den raratsü atema temulungtetba tulu aliba lenir kaka akümtsü, aser taruba putu atema nüngshilong azüngtsütsü ajungshi. Paisa, India constitution koda tongtibang iba indang lemsatépba den, iba constitution ya linük atema ajak dang temaba kuli kaket ka ta ashi.

DC-i, kaketshirtem dang yimden yimsüsüba inyakyim, temzüng ozüng aser constitution angatetsü atema tejangraba alitsü ajungshia

liasü. Paisa, fundamental rights & duties ya koda tongtibang iba indang lemsatépba den linük tashi tait ka yangertsü atema diversity ya kanga tongtibang ta ashi.

"Emergency Period in India" onem dak ajemdaker Youth Parliament tetoktepba ya Ruling Bench nungi Imlibenla-i akok aser Nikili o Menangniba na tanabuba aser tasembuba jenjang nung liasü. Opposition Bench nungi Riya Dey, Longcha, Wapangtola nung mezüngbuba, tanabuba aser tasembuba jenjang nung liasü.

Kasa mapang nung Debate tetoktepba Sashikumzuk-i akok aser Imnatula o Sentipongla na tanabuba aser tasembuba jenjang nung liasü.

Sentong ya HoD & Assistant Professor, Department of Economics, Chubaienla Imchen lenisüba nung agi. Sentong nungsa lokti pela agizükba o District Sports Officer Mokokchung, Zhopovi Zecho-i jembia aser BA 3rd Semester nungi Samuel-i ken tajung ka aten. Maneni HoD & Assistant Professor, Department of Political Science, Bendangwabang-i tepela o jembir sentong tembanga liasü.

Nagaland Foothills... (TAPAK NUNGI...)

Tang ano kasa onük atema August 7, 2025 nü senden jazüka lir, saka iba senden nung jaoker ya Committee den Apex Tribal Hohos trok dang jaok aser MLA 45 mejaokba ya tesüngmangtsüka lir.

Anungji item tensa ajunga asadanger Chang, Khiamnuingan, Sangtam, Yimkhiung, Tikhir aser Rengma kin nungi külem adianu/lenir temi

küm 13 tashi iba Foothills Road Project asoshi senotsü, nübu aser shisatsü agi yaritepa aruba atema pelar.

Kasa mapang onoki ner tejashi angateta kasa tako marok lemsateper. Nenoki kechi tensa ajurudir ajuruaka, asenok teti ka dang asütsü aser iba Historic Project takok ngya merenem tashi külemi inyaktsü, ta sangdong ajangasa ashi.

GOVERNMENT OF NAGALAND
STATE COUNCIL OF EDUCATIONAL RESEARCH AND TRAINING

NAGALAND : KOHIMA

No.SCERT/TET/Gen.CORRES-3/2025/

Dated/Kohima the Aug.2025

NOTIFICATION

The State Council of Educational Research and Training (SCERT) will conduct the 5th edition of Nagaland Teacher Eligibility Test (N-TET) on **22-11-2025** (Saturday). The detailed information containing details of examination, syllabus, eligibility criteria, examination fees and important dates will be available on SCERT official website. Aspiring candidates are requested to download the information Bulletin from the above-mentioned website only and read the same carefully before applying. The candidates must apply online only through SCERT website <https://scert.nagaland.gov.in>. The online application process will start from **08/08/2025**. The last date for submitting online application is **08/09/2025**.

No applications will be entertained after the last date.

(KEVIRALEÜ KERHUO)
Director
SCERT, Nagaland, KohimaGOVERNMENT OF NAGALAND
DIRECTORATE OF INFORMATION TECHNOLOGY & COMMUNICATION

(Below New Secretariat) Thizama Road

Nagaland : Kohima 797001

No. DIT&C/Gen-92/2025

Dated Kohima, 06th August 2025

NOTICE INVITING TENDER

The Directorate of IT & Communication invites e-tendering for Supply of IT equipment and consumables from the IT empaneled firms, Nagaland.

The detailed e-tender documents can be viewed / downloaded from the following website, from **07th August 2025, 2 PM (Server Time) to 21st August 2025, 2 PM (Server Time)**:

1. www.nagalandtenders.gov.in
2. www.nagaland.gov.in

Amendments/Corrigendum, if any will be hosted on the above website.

Sd/-
Er. Sabou Yashu, Director IT&C



NATIONAL INSTITUTE OF HEALTH AND FAMILY WELFARE
Baba Gangnath Marg, Munirka,
New Delhi-110 067




NIHFW-i 2025-26 kümsük atema JNU, New Delhi den affiliate súa Full Time Ph.D Programme atema application meshir, JRF NET- ICMR/ CSIR/BDBT, ICMR etc atema, temsúa aliba candidates atema dang.

Osang tejangja, temsúa aliba lenlatem, application form, fee aser mapang telatetbatemji Institute indang website www.nihfw.ac.in nung aliba Ph.D Prospectus nung angutsü. Application form (hard copy) den annexures aser application fee densema fees ji **September 30, 2025 nü nikongdang 5:00** ako tashi nungbosa Director, NIHFW, Munirka, New Delhi- 110067 ket atongtsüba.

CBC 17153/12/0006/2526 **Director**



NATIONAL INSTITUTE OF HEALTH AND FAMILY WELFARE
Baba Gangnath Marg, Munirka,
New Delhi-110 067



F.No.A.12023/9/2016-Admn.I
NIHFW NUNG DEPUTY DIRECTOR (ADMN.) INDANG MAPA TAZÜNG LIR
National Institute of Health & Family Welfare, ya Ministry of Health and Family Welfare kübok autonomous Institute ka lir, aser iba Institute ya linük tesem ajaklen Education & Training, Research & Evaluation, Consultancy, Advisory & Specialized Services ajanga health and family welfare programmes ajungketsüba tongti technical Institute ka lir.
DEPUTATION BASIS nung iba menden tazünga atema India sensotem dang applications meshir:

Sl. No.	Name of Post	No. of post(s)	Pay Level as per 7th CPC
1.	Deputy Director (Admin)	01	Pay Level 12 of 7th CPC Pay Matrix (Rs. 78,800-Rs. 2,09,200) (Pay Band-3 Rs. 15600/- 39100 + Grade Pay Rs. 7600/- (pre-revised)

Application Form aser Hindi oshi nung iba advisement densema osang tejangja metetsü atema Institute indang website: www.nihfw.ac.in nung repringang. Employment News nung iba advertisement agütsüba anogo nungi tenzüka hopta 3 tsünga application agizüksü.

CBC 17153/12/0007/2526 **Director, NIHFW**

India ya shishilembaba partner tajung ka masü: Donald Trump



New Delhi, Luroi/August 06 (Agencies): Bodhbar aonung US Tir, Donald Trump-i India nunger osettsüset nung ano saru shilem 25 tusemtsü, ta sangdongogo.

India-i Russia nunger dang nungi totzü alizükba anema Trump-i maneni India nunger osettsüset nung saru atur.

United States nung India nunger osettsüset 'import' asüba nung joko saru shilem 50 agitsü. Ibaji US-i China nunger dang meshiba saru dang nungi shilem 20 agi tali asütsü aser Pakistan nunger dang meshiba saru dang nungi shilem 31 agi tali lir.

Saru shilem tasenba ya

anogo 21 sülen nungi mapa küma benoktsü.

Mongolbarnüa Trump-i, India ya shishilembaba tsütsü partner tajung ka masü, ta shia maneni India nunger osettsüset nung saru tali atutsü, ta metetdakja liasü.

India-i maneni Russia nunger dang totzü alizükba aser Russia den tesendaktep tajung ayuba anema Trump-i India nunger osettsüset nung saru shilem 25 atutsü temalen metetdakja liasü, aser maneni ano saru ano shilem 25 atur.

Anogo ishika tejaklen Trump-i, India aser Russia nati külemi senteper pei

rongsenkettzüng südaktsütsü akok, ta jembia liasü. Trump-isa, India-i Ukraine rara nungi tajangzüak agir, ta aitsü.

Interview ka nung jembidang Trump-i, "India ya onok atema shishilembaba tsütsü partner tajung ka masü, kechiyong parnoki onok den business kanga inyaka arudar, ajisüaka onokibo parnok den business meinyaker. Anungji onoki saru shilem 25 agitsü lemtetogo, ajisüaka maneni taruba ghonda 24 tsünga ano saru atutsü kü tebilemba lir, kechiyong parnoki Russia nunger totzü alir. Parnoki raratsü atema totzü agütsür," ta metetdakja liasü.

India aija Hombarnü Trump-i pa indang Truth Social platform ajanga, "Russia nunger War Machine agi Ukraine nung nisung jenti tepsetbaji parnoki (India) mebilemtsür. Anungji US-i India anema saru maneni atutsü," ta metetdakja liasü.



New Delhi, August 06, 2025: Bodhbarnü Parliament House nung Rajya Sabha nung Opposition lenir aser Congress Tir, Mallikarjun Kharge leniba nung opposition INDIA teloktep nungi floor lenirtem senden amendang tangokba noksa nung angur.



August 06, 2025 nü New Delhi nung Kartavya Bhavan semzüka sentong nung Ato kilonser Narendra Modi aser Union Minister of Housing & Urban Affairs, Manohar Lal na den tangartem tangokba noksa nung angur.

Tzüngluruwa mongpu tenzüka sülen HP nung nisung 194 süogo

New Delhi, Luroi/August 06 (Agencies):

Taküm tzüngluruwa mongpu tenzüka sülen Himachal Pradesh state nung tzünglu dak sendakba lendong balala nung nisung 194 süogo aser kiojen jenti raksaba ajanga sen crore aika takoksa nguogo, ta Himachal Pradesh Department of Revenue-DM Cell-i metetdaksü.

Taküm June 20 anogo nungi tenzüka August 5 anogo tashi nung Himachal nung nisung asüba aser kiojen raksaba report tejangja agütsüogo. August 5 tashi nung state nung asür 194 nungjagi nisung 108 bo tüzümsüng aser anentsü lendong balala nung asüba lir; tanünga nisung 86 ji gari lendong balala nung asü.

Tzünglu dak sendakba lendong balala nung asürtem teimbaji Kangra district (25) nung liasü; Mandi nunga nisung 23 asü aser Kullu nung nisung 10 asü.

Iba dak alia July ita nung kiset shiruru 28,438 asü aser August ita tenzüka sülen anogo pongu tsünga kiset shiruru 4,396 asü.

August 5 tashi nung ki 579

kanga mejungi raksa aser ki 1,741 terara raksa. Iba dak alia dokan 345 aser nashi-ki 2,012 raksa, ta ketdangsertemi metetdaksü.

June 20 nungi August 5 tashi nung tzünglu dak sendakba lendong balala ajanga sen lakh 1,85,251 shi jenjang takoksa nguogo.

Lendong balala ajanga takoksa angurtem yaritsü atema State Emergency Operations Centre (SEOC)-i helpline 1070 agüja maneni lenmang balala ajanga yaria arudar.

August 6 anepdang 10:00 ako tashi nung state nung gari lenmang 613, distribution transformers (DTRs) 1491 aser water supply schemes 265 raksar lir.

Mandi district nungbo gari lenmang 375 mokdanga lir, DTRs 301 aser tzu supply schemes 86 mejungi lir.

Himachal Pradesh State Disaster Management Authority (HPSDMA)-i maneni iba tensa mita repringba den külemi sensotem dang nungdak tulu melira ainlen mesenzütsü ajungshir.



TIR YIMYIM YIMOBILEM (EDITORIAL)

DIMAPUR THURSDAY, AUGUST (LUROI) 07, 2025

Mapa inyaker nem sen magütsütetba

Nagaland nung Municipal Council asem rongnung tulutibaji Dimapur Municipal Council asütsü aser iba amaji senotsü arulena Kohima aser Mokokchung Municipal dang nungibo Dimapur Municipal Council (DMC) purtemsa teimba asütsü. Ajisüaka, DMC nung inyaker nem taoba ita pezü tashi ita sen magütsüteti arubaji tamakok dang masü saka ketdangsertemi pei kübok inyaker nem taküm aser kibong tia indang mebilemtsüba jakla ka sayur. Atangji, DMC ajanga shishilembaba maparen tapu balala nung alimelen agiba aser saruba agibo inyaker nem ita sen magütsütettsü, ajisüaka inyaker nem ita sen agütsütettsüsa ketdangsüba mapa nung inyaksübaji mapa nung kibur mesüra tekolakba mesüra lenir khuret aser teinyaktsü asütsü tim. Municipal nung ita pezü tashi ita sen mangurtem rongnungji anepdang shia yimti yimdong aokertem dena lir, item jagi yimti nübortem mesakdang, anepdang yaktayongi yimti yimdong ajak merükteta toktsüba ajanga teti yimti merüka angur. Item mapatemji tulu aser tesempatsüka saka ita senbo tilaka dang asütsü. Itemjia kasa kibong lir, anungji anogo shia aser ita shia pei kibong aser chirnurtem taküm nungdak balala asoshi sen nungdaker. Atangji, DMC senpong nung sen maliba agi inyaker nem ita sen magütsütet asütsü, ajisüaka ita pezü tashi ita sen mechimenu achir mapa inyaker nem ita sen magütsüi yutsüdangji, parnok kibongtemji shibai kechi agi mesüdar ta bilemer odang yutsür asütsü ? Joko, ita pezü sülenbo timtem aremer maremtet DMC nung inyaker nem longkak aitba agi anogo ishika tsüngda ita sen magütsüi alibaji tesadang kabo agütsütsü ta nangzüka angashiogo. Iba osangji angashidang, inyaker nem longkak mait asübo aji agütsütsüba jia tebilema mebilemi lila na (?) ta mepelai bilemer. Atangji, state government nunga tang amaisa mapa inyakdaksütsüba masü saka mapa meinyak ita sen chia alitsüsa mapabo mali ser mapa inyaker nem shim tashi, tang DMC nung ajuruba amai kopi melii ita sen magütsütettsüsa tensa tia ajurutsü ana nung lir. Government asoshi inyaker nem ita sen agütsütsüba yabo talila inyaksema mapa ka masü saka inyaksü tsüa akaba mapatem rongnung tilatiba ka lir, ajisüaka Nagaland nungbo state government-i la kübok mapa inyaker nem ita sen agütsüba jia tangar aikati meinyaketba mapa tasen tuluka takok ngua inyaket amai jembir aser nübortemia bilemer. Ibaji asenok alar kolok adenba nübortem asüba agi, kechiyong alar asoshiibo chi ngura ojang, aji takok tuluka. Kasaji, tang DMC nung inyaker nem taoba ta pezü sen nungi ita ana sen yakta agütsütsü nangzükbaji DMC asoshi takok tuluka amai asenokibo bilema alitsü, ajisüaka yangji takok masü saka tamakokang tali shisanger. Dimapur yimti ya Nagaland nung yimti tulutiba lir. Iba yimti nungang tayimtsüa aser train a arua anener, anungji tangalen nungi Nagaland-i arurtem ajak Dimapur tama tonger külenang tangalen aoer, anungji anogo shia aser teti Dimapur ya merüka dang masü saka topur junga ayutsüba jia DMC mapa asütsüla. Aji oda, Dimapur nungbo street light tsüklokba yindong tashi 'design' tapu balala enoka narodong amai yanglutsüla. Ibaji dang masü saka Dimapur nung alirtembo tangar dang nungi awashi aser wainshin temetetba asütsüla, kechiyong tangar aika asoshi Nagaland-i arudang tamasa Dimapur pur tama ajurur, anungji Dimapur purtem awashi aser jakla yimyaji Naga nung awashi aser jakla yimya akümer. Item maongka aser khuretemji meteta, DMC nung ketdangsertemi pei kübok inyaker nem tangatetba agüja anepalutsü aser parnok inyakba taa shitak mapang shitak nung agütsütsü ta inyaka aotsüba khuret indangji süoki ia bilemtsüla. Joko, tangbo state government nung asüyonga mesüra Municipal nung asüyonga, pei asoshi tajangzüka angutsü bilema masü saka pei nübodok aser rongsen endok mesasai angati pei lima yanglutsü aser pei nübortem tenzüksü tangatetba nung shilem magitetra, tang amaji pei kübok inyaker nem ita sen magütsütetba timtem aser tamakokang ajurupet ajurutsü.

OLEMSABANG

Asenok lisopur saksalemtsü aser longjemshitsü tensa kati menepogo

~ L. Kika Pongener

(Yashi adok nungi...)

Tangar kinbo oshi dang tera peta jembia angashira, senteper tepo akümtsü aser kümzüksü....Iba sulenjiang shibaji shiba (?)....ajakji asüngdangtepa metetteptsü. Taoba ita nung asen Aor ka dak tzümar kati züka lia....Tia kaa asen Aor ka sua denjia, pai tasü-ita tzümar züka alisangji kümzükogo....Pa dang asen Aotsür Aor ajaki kanga pelatsüla....Aser pa nungi lesson angazüka tarutsü nunga iba amaji kati ka den yariteptsü aser timtem nung alidang kati ka kümzüksü ibaji tetenzüker sudi. Anungji tang atalokba yagi asen Aotsür Aor tali saksalemdi aser asen o asen na tali longjemshidi.

Asenok asen tetsü taso-lima toktsür jila balala nung, pei pei yimdaki moi teret endoka alitsü. Aser tang atalokba amai mapang shia kar mesura kar dak ataloktsü. Anungji shir dak atalokdir atalok-aka, metpur kija metoktsüi lisopur ajak longjemer ola atoktsüla aser tim teinyaktsü inyaksüla. Aji oda, tang amai atalokdang kin shia lanurtemi acha-ayanga osangtsüsang tongteprateper külemi ola kabo atoktsüla. Tanü putu nung osangtsüsang tongteprateptsü 'Social Media' sabang peria kar. Mapang kar nung lisopur kar dak tzüma-longmar aser tangar kin kari tim masü kar inyakra....Mempur kija metoktsüi, lisopur ajak külemi longjemer ola atoktsüla....Mempur kija toktsüra, ashiko, mapang kar nungbo tangar kin nem amokbangdaksütsü, aser ibaji metpur kija tamakok masütsü, asenok lisopur ajunga tamakok aser maaksu asütsü. Tangbo aseni amokbanger sobaliba dak aketba ama tensa den tapet takok ngua tim teinyaktsü inyakogo. Aji oda, asenok kati ka tashi-shia yariteptsü melena, tashimaitang kar ajiteta tilu-panglura, ibaji asen sasa asen temeyong metepshir asütsü. Anungji tang amai atalokdang asenok lisopur telongjem takang ka sayura, tarutsü nung asenok lisopur dak shinga-ia temulong ulua tamajung kecha meinyaktsü. Dimapur, Niuland, Chumoukedima nung nutsüng yongsuk lakh ana shi aliba nung, asenok lisopur tesadang aser tangar kin tesadang shi alitsü sudi....Aji oda, asenok lisopur melongjemra, tzümartem aser tangar kini asenok kecha sukshia malitsü aser asenok amokbangtsü. Jokorla, asenok lisopur ajaki tzümar nutsüng-yongsuk tali züina aoba ya kangasa tenuk yoka meita reprangtsü mapang kati menupogo.

Anungji Aor senso kar dak tangar kin kari tim masü kar inyakra....Aor ajunga külemi longjema adenshir ola kabo atoktsüla. Aji oda, shir dak atalokdir atalok-aka, metpur kija jagi-sa ola atokra aser pei temeden bushira, tangar kini asen Aor-ji kangabo retreta magitsü aser asenok kenu kar kenu kar ta akoktsü. Aji oda, mapang kar nungbo asen nisung-ia aibelentsü akok, saka aibelenogo ta ser metpur kija senzuka-a metoktsüi....Aor ajunga külemi longjemer teyaritsü tim yaritsüla, aser iba sulen-jiang aibeleno lira asen sasep nung metongshiteptsüla. Iba amaji asenok telongjem sayura, asüng-yanu kecha kin-ia asen Aor dak tamajung inyaksü temulong moulutettsü. Dimapur, Niuland aser Chumoukedima temeküt nung ya Aor kibong merijang ter dak tali alitsü sudi....Aji oda, Aor senso kar dak tangar kin kari tim masü kar inyakdang....Aor lanur ajunga külemi adenshir ola atokra....Iba tsüngken ola jagi asenok telongjem takang ka sayutsü. Aser idangji tangar kini asenok telongjemji ngur asen Aor dak tamajung inyaksü kecha kin-ia temulong moulutettsü. Anungji asen Aor khi longjemshitsü mapang kati menupogo ta temulong nung kanga rongba bilemba agi ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tennessee state tesem ajaklen Khristantemi lumia sarasadem



Tennessee nung sarasadem sentong 'Pray4TN' nung shilem agirtem kar noksa nung angur.

August 06, 2025: US kübok Tennessee state tesem ajaklen denomination balala nungi Khristan noklang aika adenshir kibongtem, yimtitem aser linük tesem ajaklen temelenshi adoktsü atema sarasademogo. Anogo 30 nü tashi sarasadem sentong 'Pray4TN' ya July 1 nü tenzüka liasü aser August 2 nü tembangogo.

Iba sentong ayongzükertemi ashiba agi, tesüiba mapangtem nunga iba ama sentong ayongzüka agiogo ajisüaka taküm iba sentong agiba mapang ya khenyongi balala liasü.

Pray4TN State Facilitator, Barbi Franklin-i sangdong ka ajanga, "Iba ya Tennessee sorkar kümsük tasen tenzüka mapang ka lir. Iba mapang nung onoki sorkar lenirtem atema sarasademtsür, onok saka ajemalua temenen tatok meshir, ozü state nung temenen menaba aser pei menen atema onoki tatok meshir. Volunteer State ka ama onoki Tennessee nung Yisu nem tetushi agütsüner," ta metetdaksü.

Yaküm State Rep. Monty Fritts (R) leniba nung bangzüng ka renema July ita ya lumia sarasademba aser Tsüngrem dang tatok meshiba ita asütsü atema telemtetba agia liasü.

May ita nung Governor Bill Lee-i HJR0051 nung sign süa July 1, 2025 nungi July 31, 2025 tashi Tennessee nung lumia sarasademtsü, Tsüngrem dang taochi meshitsü aser state anepjang ta sarasademtsü lemteta liasü.

Sentong ayongzükertemi, "Tennessee nung rongdak tebilemtsü onük aika lir, jilatem nung temesepba mozü amshir, balalulaba kibongtem aika lir, ozüng alema inyakba kanga bulua akümer, aser ibaji ajanga teimla aser taneptsüba kanga nüngdaka kümogo. Ajisüaka ozüng mesüra yimtenren lenirtemi teimla mesüra taneptsüba magütsüteter. Tatok memeshi nungbo tanela asentenshi milak malitsü. Asenok teimlaji Yisu dak dang lir," ta metetdaksü.

Yaküm osangbenertem den jembidang Fritts-i, "Ni-a iba bangzüng pusemer, kechiyong

state nung ozüng alema inyakba mapatem, nisung shibelenba, temesepba mozü achiba aser sorkar ochimashi densema state nung tebilemtsü onük aika lir," ta metetdakja liasü.

Fritts-i, "Itemji asenoki inyaktettsü mapatem lir; iba ya legislative khuret kija masü. Item tebilemtsü bentettsü atema senotsü lemezükja mali, kechiyong item tebilemtsü onük ya tanela dak sendakba tebilemtsü onüktem lir," ta metetdaksü.

Interview ka nung jembidang GOP State Senator Mark Pody-i, "Onoki Tennessee nung Tsüngrem jaokner. Onoki yimjak nung Yisu Khrista Kibur ta sangdongner. Onoki bangzüng

nung ibajia zülusema lir," ta metetdaksü.

Iba sentong takok angutsüsa County nung lenir 250 dak temai shilem agia liasü, ta Franklin-i metetdaksü.

July ita tembang tashi nungbo state kübok courthouse 95 prongla nung sarasadem sentongtem agia liasü, ta sentong ayongzükertemi metetdaksü.

Hamblen County Courthouse nung shilem agir Rev. Dr. Robbie Dale Glover-i, sarasadem sentong nungji shilem agitsü atema la Israel nungi aru, ta metetdaksü.

Glover-i, "Khrista nung temang ka ama longjemtsü aser Pa matsüngdang apudaksü atema onoki yangi lir, kechiyong Pa ya ajak yanglusang lir," ta ashi.

ANOGO ABEN TSÜNGREM DEN

Tsüngremer Tereprangtetba

- T.Ken 73: 13 - 17.

Bendanga agütsüba Khristan taküm kaji shidakba tetemjen taküm asü? Tashi mangartem azükarua alidang Kibuba dang tashi anga alitsüji tim asü? Asaph süngmangdaksübaji ibaji liasü.

Tekong 1 - 12 tashi nung atangji pai taküm tajungji züdoka liasü ta pai iba ken nung zülü." Atangji amajok nung kü mulungjang merüktet, aser tai makaba nung kü teka shidok; kechiyong anogo tepiyong ni kangshir, aser anepdang shia ni merenshir. Ni yamaji jembidir ta ashi asübo; ajiang, ne chirnur putu den ni külaka inyaka lila" (t. 13 -

15).Item ajak ya koda tembang? " Ya koda angatettsü ta ni bilemdangdang; ni Tsüngrem külemdaki orr, parnok tesü tia mebilemdang tashi, ni atema ya onsara timtemtsü ka liasü" (t. 16,17). Asaphi ajibaji tai liasü, aser iba jagi pai Tsüngrem mebushi tashi taküm indang asüngdanga liasü.

Nai tenem ka talang nungi reprangra, nai langka angutsü. Saka tenem kasaji anasai orr reprangra balaka angutsü. Nai ajiba jagi noksaji melenshir masü, saka ne dak koda kongshir. Anungji asenoki Tsüngrem külemdaki aotsüla. Pa indang Pa külemdak nai kechi angazüker aji tongtipang lir.

Nai ne mulungjang amajok nung merüktetter asü? Atangji, masü. Ajaki temulungjang temerük aginer.Nai ne teka tai mali ta metsükdoker asü? Ajaki teka temerük aginer. Mejembitsü o ne meli agi jembir asü? Tekong 15 nung metsübuttsü indang ashir.Nai koda bilemer shidakbaji Tsüngrem dang shiang.Na ratamata lir asü? Süra na Tsüngrem külemdaki aotsü tenüngdaksü.Tsüngrem den mapang agiang. Pa o nungi ne tebilemba angatettsü.

Tsüngremi angatetba tsütsü nungi ne mangdang meyipa reprangdangang.Nai ajibaji kota ajiba südakjang. Iba jagi na ajujiba nuni kümzüksü, aser nai Tsüngrem den takokba nung jajatsü.

Nüngdak mapa nung ne tebilemba nungi tepila tulu adoktsü akok. Tsüngremi asenok nem Pai ajiba ama ajidaktsüner.Tsüngrem indang shisadangang aser aji inyaksü asoshi Tsüngrem külemdaki oang. Tsüngrem o agi ne kolok aser ne mulungjang sünga lidakjang.Ne khuret Pa nem bendanga agüjang.

Seattle nung Tenla kidang züngsem ka khasetba atema Arogoi mangyimer



August 03, 2025 aonung Seattle nung aliba Pursuit Arogo Tenla kima nisung noklang aika adenshia asür, Lebron Givaun nem akhüm agüja candlelight service agidang tangokba noksa nung angur.

August 06, 2025: Taoba hopta Seattle nung aliba Arogo ka nung züngsem ka khasetba sülen Arogoi mangyimer.

Arrshi küm 28, Lebron Givaun khasetsangji police-i bushidar.

Lebron den par kibong BBQ aser Pursuit Arogo nung taintem sentong ka nung adentsü aruba mapang nung prangpong amer kati khaset.

Iba Arogo ya University of Washington anasa lir.

Prangpong amer ka gari temesüng ka nungi ayazüka alur injang khaloktsüba sülen gari jagi tua mener ajen. Iba nisungba jagi Tenla kima gari anena ayuba tesem nung lokti dakji injang 30 dak tali khalokja liasü.

Tesülen gariji tanga Arogo Tenla kima ka anasa angu.

Pursuit Arogo nung pastor,

Russell Johnson-i, "Mimlaba tatalokba ka ajanga Arogo akhümket raksatsüogo. Aonung 7:10 ako meta student tem adult class nung adentsü atema aruba mapa nung gari ka aruba sülen Tenla kima anen. Iba sülen nisung kati injang aika khaloktsü," ta metetdaksü.

Johnson-i, "Nisungbaji jagi mask tanak ka agi tejak nembanger liasü; pai lokti dakji injang aika khaloktsü. Gari nung mena alir katia injang khaloktsü," ta metetdaksü.

"Parnoki injang 30 dak tali khaloktsü. 2025 küm nung America nung aliba Tenla kidang yamai atalokba ya mamangteter," ta pastor-i metetdaksü. Amongnü tekülem sentong nung Johnson-i züngsemtem dang, "Iba tatalokba nung Lebron dang

asü. Lanursang ya hopta ka tejaklen ang kibong küma liasü. Ita ana tejaklen ang Lebron-i Yisu nem taküm bendanga agüja liasü," ta metetdaksü.

"Pai Instagram nung tesüsabuba post asübaji young adult service nung adentsü atema tangartem jaokba post ka liasü," ta Johnson-i metetdaksü.

Lebron'er kibong yaritsü atema GoFundMe page ka tenzükogo.

Johnson-i, "Ozüng alema inyakertem atema-a telatetba kar lir. Anüngdang tekülem kidang lia nisung ka mekahsettsüla. Lokti dak injang khaloktsü, ajisüaka nisung aika masüba ya tesüngmangtsüka lir. Joko yamai mataloktsü ta ni amanger," ta metetdaksü.

"Seattle nung nisung tepsetba ken otem shilem 76 bo

mebushiteter. Iba tatalokba atema ochi temeden angutsü atema asenoki sarasademmer," ta pastor-i ashi.

Pursuit Arogo den nisung aikati mangyimjashi lemsatepba den külemi iba Arogo atema sarasademtsür.

Pastor Greg Laurie-i, "Pastor Russell, na aser ner Arogo atema sarasademtsür. Talisa iba tatalokba nung asür kibong atema sarasademtsür," ta metetdaksü.

Khristan lenirtem- Cindy Jacobs, Lisa Bevere, Jentezen Franklin, Kim Walker Smith aser Rodney Howard Browne nungeria Lebron'er kibong, Russell Johnson-i aniba Arogo aser Seattle nung aliba nüburttem atema sarasademtsüba lemsatepogo.

Amongnü aonung Pursuit Arogo Tenla kima nisung noklang aika adenshia Lebron nem akhüm agüja candlelight service agiogo. Pastor Johnson-i, "Tsükchirtemi amakba aser Tsüngremer nüburttem amokmerenba ajanga Pacific Northwest nung azükaru malitsü," ta metetdaksü.

Paisa, "Kibuba yimliji tejakleni aotsü. Iba region nung Tsüngremi Pa tajungtiba inyaksü. Onoki samaba santem bushitsü aser kümzüksü atema maneni inyaksü tanü-a onoki azüngashir," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tesem

(n) tesentepdak, talidak meta, alushi (place)

* Tanü asüng ya tesem ajaklen tzünglu arur.

Tesempa

(adj) memeim (hate)

* Parnoki tesempa agi onok magizük.

OLONG PAITEP # 7232

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 7231 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

NAI-A YA METETTER MA



ALIMA RARA TANABUBA INDANG TEMETETTSÜ KAR.

Iba rara ya "Allies" aser "Axis" na tsüngda rara. Allied telok nung Britain, France, Russia, China aser United States nung densema liasü aser Axis nung Germany, Italy aser Japan densema liasü. Rara ya 1941 küm tenzük aser 45 küm tembang. Rara nung Spain, Sweden aser Switzerland nung amala linüktem kecha telok nunga maden. Rara ya 1945 küm May 8 nü Germany-i surrender asüba sülen tembang. Rara nung ajak senteper nisung million 64 shi asü, koba tang tashi nung alima rara tamajungtiba ta züngshir.

Assam: Guwahati bypass nung foot overbridge 5 yanglutsü



Guwahati, Luroi/August 6 (Agencies):

National Highway 27 (NH27) kübok Guwahati Bypass nung foot overbridges (FOBs) tasen pongu yanglutsü atema National Highways Authority of India (NHAI)-i jenjang agiogo. Iba ajanga tetsüng agi sen z ü sen p ong e r t e m teküzmükba kübok toktsütsü aser urban infrastructure ajungketba nung tongtibang jenjang ka agiba asütsü.

Iba project ajanga nisung kanga nongtepba aser talisa educational aser institutional tesem balala anasa nisung nongtepba bentettsütsü.

Overbridge tem ya Jalukbari (Assam Engineering College anasa), Tetelia,

Gorchuk (CPWD Office anasa), Royal Global University Point, aser Lalmati (Games Village anasa) amala tongtibang tesemtem nung yanglutsü.

Iba terenlok indang Bodhbarnü X ajanga sangdongba mapang Chief Minister Himanta Biswa Sarma-i senzusenpongertem nem anisüngzük agütsütsüba dak rangloker iba jenjang agiba metetdaksü.

"Senzusenpongertem dak rangloker@NHAI_Official-i escalator inoka NH27 kübok Guwahati Bypass nung tongtibang tesemtem nung foot overbridge pongu yanglutsü, koba senzusenpongertem aser talisa kaketshirtem lendong

kecha makai lenmang süidaksütsü atema lir. Iba lenmang tepeyong Streetlight dena inoktsütsü.

Iba osang sangdongba den külemi Chief Minister-isa, foot overbridge yanglutsüba tesemtem indang map tejangja lemsatepogo aser ashiba agi, km 18 bypass ajunga ya streetlight inoka sangwa toktsütsü.

Urban planner temi Guwahati amala kanga kara renloka aoba yimti ka nung senzusenpongertem kecha lendong makai lenmang süidaksütsü atema jenjang agitsü benoka arudar.

Iba project ya yangluzükba sülen iba ya Northeast ajunga nung urban highway development atema model ka asütsü.

Tetsür ka dak mebenshitsü yimya benshiba sülen Bishramganj nung mepetmsü adok

Agartala, Luroi/August 6 (Agencies):

Tetsür ka dak mekongshitsü yimya agi kongshia mebenshitsü yimya benshiba sülen Tripura nung Sepahijala district kübok Bishramganj nung Mongolbar aonung mepetmesü adoka liasü.

Tetsürla ya Guwahati nungi intern ka liasü aser la ya Mongobarnü Agartala-i meyipa arur kidangi aoba mapang külem passenger kati la dak mebenshitsü yimya benshia liasü.

Bus nung mena alirtemi mejanger ama sayua iba talokba ya sentoka toktsü. Iba sülen tetsürla ta mozükidangi anir ao aser osang ajanga ashiba agi, lai iba tatalokba ya shilem karbo la indang phone nung tangoker liasü.

Iba osang prokshiba sülen local tem noklang aika adenshi

asir parnoki bus ya raksaja liasü. Tensa tamajungba küma meyoktsü atema ketdangsürtemi Bharatiya Nagarik Suraksha Sanhita kübok Section 163 dak ajemdaker tenokdangba agütsüogo.

Police den Tripura State Rifles aser CRPF personnel tem iba tesemi yoka liasü. IG (Law and Order) Ipper Manchak-i iba tesem semdang aser nüburtem dang social media nung olulu osang meprokshitsü mepeshia liasü.

Local sources temi ashiba agi, tetsürla ya tribal ka aser aija alisang ya non-tribal ka liasü, aser iba ajanga kari iba lendong ya kin o kin tsüngda mangatettep ka ama agir.

Ajisüaka ketdangsürtemi, ken o tang bushisüngdang tesüdak lir ta nenshia

metetdaksüba den osang tai meprokshitsü tekümdaksü metetdaksüogo.

Tipra Motha Party ngutetsang, Pradyot Kishore Debbarman-i, tetsüla dak mebenshitsü yimya benshiba aser lokti-i jenjang agia mepetmesü adokdaksüba aitsüogo. "Iba ya tribal mesüra non-tribal ken o ka masü saka tetsür ka meraket indang lir," ta pai ashi.

Paisa, lokti-i jenjang agiba ya agizüktsü makok ta ashiba den pai tesürla, lar kinunger aser state DGP den jembiogo, ta ashi. Debbarman-i teyari agütsütsü mulunga aliba lemsatepba den yimjung asoshi mepeshia liasü.

Police-i ashiba agi, aija alisang ya Bishramganj motor stand matongdang bus toktsür ao, aser pa aputsü atema inyaktepdar.

Manipur nung tebur chanu ka Japanese Encephalitis agia asü

Imphal, Luroi/August 6 (TYO):

Manipur, Imphal East district kübok Phaknung Awang Leikai nung alir arishi küm 15 tain tebur chanu ka Japanese Encephalitis (JE) agi süogo, ta ketdangsürtemi Bodhbarnü metetdaksü.

Tebur chanusang ya Khundongbam Ibomcha'er jabaso Khundongbam Elan ta jangjaago, aser pa dak August 2 nü Jawaharlal Nehru Institute of Medical Sciences

(JNIMS), Imphal nung JE puteta liasü. Pa temang anepalua aliba mapang August 4 nü asü, ta Phaknung Social Youths' Club (PSYC) sangdong ka ajanga metetdaksü.

Pa asüba sülen PSYC aser PHALYDA nati Vector Borne Disease Control Programme, Imphal East den longjemer Phaknung Awang Leikai aser iba temeket nung aliba tesemtem nung fogging

operations ka benoka inyakogo.

Health department data ajanga, Manipur nung January 1 nü nungi tang tashi nung Dengue: 138 cases, Japanese Encephalitis (JE): 10 cases, Malaria: 61 cases mangaoka aliba sayuogo.

JE tashidak ya Imphal East nung nisung 4, Imphal West nung 2, Kangpokpi nung 1, Thoubal nung 1, Kakching nung 1 aser Ukhrul nung nisung 1 dak putetogo.



13th July 1987 29th July 2025
“Saka ni alangzüksang Taküm lir ta ni junga metet,
Aser kenü anogo alima nung Pai Noktaksü.
Aser kü mang shizüka or külen, Shi nung mesüia ni Tsüngrem
ngüküm.” - Yob 19:25, 26

PELABA LEMSATEPER

Kodanga amatsü makokba, onoki teti meima aliba jabaso **Asür Akumtemjen I Ao** (Kelingmen), 29th July 2025 anogo nung ajungbena amang tiyong nung milen züksep ama, anojungi kibubai jar aoba anogo ajurua onok mulung zürepba taku marok ajemba tia nung alidang temeimer kija kibong, lokti, ana aser talang nungi shirnokisa asüku lemsatepba den, rongsen, nübu, sarasadem aser shisatsü tajung bener arua onok mulung süngzükdakja yaritepogo, nenok den tsüngdong arua pelaba meshitet nung, iba sabang ajanga nenok dang pelaba lemsateper.

Nenok temeim mapa tajung onoki kodanga mamatsü aser onok mulungjang nung teti alitsü. Onoki nenok nem kecha meyipa magütsüteter, saka Teyanglur Tsüngremi nenok moajang ta onok tamang sarasadem.

Lokti kar tenüngteta pelaba lemsateper:

- | | |
|---|---|
| 1. Dimapur Ao Baptist Arogo | 12. Viola Colony Council |
| 2. DABA Youth Ministry | 13. Viola Colony Youth Organization |
| 3. Rionsanger Putu Menden Kelingmen | 14. Eastern Theological College Jorhat |
| 4. Shilang Zunga, Kelingmen | (Class of 2014) |
| 5. Kelingmen Laishir Telongjem | 15. Ao Baptist Arogo Jorhat |
| 6. Dimapur Kelingmen Senso Telongjem | 16. Naga Student's Union Jorhat, Assam |
| 7. Chumoukedima Kelingmen Fellowship | 17. Clark Theological College, Aolijen |
| 8. Dimapur Kelingmen Fellowship | 18. Doulos Theological College, Dimapur |
| 9. Dimapur Kelingmentsur Telongjem | 19. Luyim Ao Baptist Church, Medziphema |
| 10. Dimapur Area Chuchuyimlang Senso Telongjem | 20. Grace Place Ministry, Dilai Gate |
| 11. Dimapur Mejongenshi Asotsur Telongjem Dimapur | 21. Swiftcare Ambulance |

~ Temeim Tsürabur, Tenu aser Kinüngerterem.



KOHIMA AO OFFICERTEM TELONGJEM

“Telongjem nung leniba”

TENÜNGSANGAGÜTSÜR



Süngratsü Wabong J. Yapang Imchen'er jabaso **Wb. Sentianger Imchen**, IAS-i jenjang tulu aketba akhümket menden Chief Secretary kümtebba takok tulu asoshi Kohima Ao Officertem Telongjem (KAOT)-i kanga pelaseta pa nem tenüngsang agütsür.

Nai nübor tenzükbba mapa nung tatishitsü tajung sayuteta bendanga agüja inyakba mapatem onok asoshi teti tashi angudak asütsü.

Na nübortem tenzükbba mapa nung khuret aser maongka tuluba agizüka inyaka aodang , Tsüngremi nü nem ano maneni anema aliba taküm, shisatsü aser takok moajangma ta onoki sarasademtsür.

Sd/-
LIMASUNEP JAMIR, IPS.
President, KAOT.

Sd/-
RONGSENLEMZUNG
General Sectary, KAOT

Gaza nung truck pezü makepok, nisung 20 asü

Deir al-Balah, Luroi/August 06 (Agencies): Gaza tiyonglen nisung telok tuluka alidak trucks pezü makepokba lendong nung nisung 20 asü aser 30 dak tema yiru, ta Hamas meyong civil defence agency ajanga ashir.

Mongulbar nikongdang Deir al-Balah south east len aliba lenmang ka nung garitem alidaki nüburtem asemtepa ao. Parnok gari tekolaki atu, anungji gari anirtemi gari mezüokteti akum, ta yangji aliba osangbener temi ashi.

Iba tesem ya Israel mitkar tawabangba kübok lir aser lenmang tem kanga majung aser lendong keta lir, ta civil defence agency odongtar Mahmoud Basal-i ashi.

Tang Gaza nung tenzüka aliba private transport association ajanga ashiba agi, Mongulbarnü iba territory telungi commercial trucks 26 ayi. Truck trok nung bena aliba osettsüset auyar ao aser iba mapang pezü makepoka nisung asü aser yiru.

UN dak metaloka aliba ajemtsü aser Gaza telungi teyari oset tem private sector ajanga tanem-tanemi bener odaktsü tenzüksü, ta Israel-i sangdonga lir. Mela aliba oset nungya kinü tanur indang chiyongtsü, süngjang-lijang, aonsotsü, mürekmejuba oset aser basic staples dena lir.

Civilian tem teyari oset iba lenmang ajanga agütsütsü asoshi hopta aika atatepa liasü ta Hamas-i ashir. "Iba yongji trucks sünga nisung agi metembanger," ta par media office ajanga ashi.

Teyari oset bena aliba trucks sünga teti nisung adenshir, aser rongrong-shironga adoker.

Bodhbarnü Israeli settlers temi Gaza leni teyari oset bener aoba trucks 30 amak, ta Jordan-i ashi aser iba ama amakba nungi menokdangtetba atema Israel aitsü.

Convoy ya Jordan arütsü alemer Gaza indang Zikim

crossing leni oyaa liasü. Iba mapang Israel settlers temi lenmang mokdang aser trucks nung long agi aon tenzü.

"Yangi Israel-i süoki ia temulung agütsütsü nüngdaker aser item convoy nokdangar nem tatok magütsütsüla," ta sorkar odongtar Mohammad al-Momani-i ashi.

Deobarnü iba ama atalok aser ibai Jordanian aid convoy nung tanaben amakba alitsü, ta pai ashi.

Bodhbarnü Hamas meyong health ministry ajanga sangdong ka nung chiyongtsü peria achi-ajem masüba ajanga nisung pongu asüba sangdongogo, anungji rara tenzüker tanur 96 densema iba ama tepok masüng asür 193 ajunger.

Gaza nung alir ajunga yasetdaksür aser kangadang tongtipang teyari oset lema agütsüba nung Israel-i tetsükdaktsü agütsür, ta international aid organisations aser human rights groups 100 dak temai tekumtangtsü shia lir.

Israel Ato Kilonser Benjamin Netanyahu-i iba territory nung yasa-tzüraba mali aser par linüki teyari menokdangar ta shijen ashir.

Taoba hopta Israel mitkari Gaza telungi aid convoys yoktsü asoshi humanitarian corridors lapktsü aser tesem asem nung humanitarian mapa asoshi mitkar inyakyim anena atatsü aser bendanger nem teyari oset anünglen nungi yoktsü melatsü, ta shia liasü.

Hamas-i October 7, 2023 nü Israel south tsütsü maka nisung 1,200 shi tepseter ano nisung 251 pua bener Gaza-i aoba nung langzüa Israel mitkari Gaza tesem ajungalen sapanga yur amak tenzü.

Iba sülen Israel sepaitemi Gaza nung Palestine nunger nisung 61,020 tepsetogo, ta Hamas meyong health ministry ajanga ashir.

Trump indang envoy-i Russia Tir Putin den senden amen

Moscow, Luroi/August 06 (Agencies): Russia Tir Vladimir Putin-i US Tir Donald Trump indang special envoy Steve Witkoff den Bodhbarnü Moscow nung jembishinü kaogo, ta Kremlin-i ashi, koba White House-i Russia dang Ukraine den yimjung tezüngzüktep meyaglura rongsenketzüng tsütsü temerenshi agütsütsü anogo atakzüksüba tatonger lia ajuruteper alitsü.

Kremlin-i iba senden indang osang tejangja kecha agüja mali. Senden mamendang Witkoff ya anepdang yakta Zaryadye Park nung Russia tir indang envoy for investment and economic cooperation, Kirill Dmitriev den tetsüng agi otsü atonga senzüa liasü.

Tawa Istanbul nung Russia aser Ukraine nungi ketdangsürtem tsüngta indang-indanga ajurutepe jembishinü akaba aser Russia aser US ketdangsür tsüngta sensaksem akaba nung Dmitriev yagi tongti shilem agia liasü. Iba jembishinü

nung Russia-i küm asem tashi par kidanger amakba anentsü asoshi terenlokba kecha mali.

Trump-i Putin nem anogo sükzüksüba Hokulbarnü tembangtsü. Nisung tepsetba manenra tariff tesashi meshitsü aser rongsenketzüng temerenshi agütsütsü, ta Washington-i amokmerena lir.

Nüburtem tasü mait kumdaktsütsü tebilemba nung Russia-i Ukraine indang civilian areas nung tali amakba asoshi Trump-i Putin dang tali tezü atangba lemsateper. Trump-i tawa ang Russia lenir dang azüdokshi anentsü ajungshiba sülena amakba tali akumer.

Mongulbar aonung nungi Bodhbar anepdang tashi Russian sepaitemi Ukraine south tsütsü Zaporizhzhia region nung recreational center ka amakba nung nisung ana tepset aser tanur ana densema nisung 12 yiru, ta regional Gov. Ivan Fedorov-i Bodhbarnü ashi.

Russian sepaitemi iba tesem nung pezüben amak aser

mezüngbo glide bombs tesashi agi amak.

"Yasüng amakba nung mitkar tebilemba khenyongi mali. Taochi maka nungi tsübodaktsüb dang lir," ta Ukraine Tir Volodymyr Zelenskyy-i Telegram post ka nung ashi.

Ukraine nunger asükwa asoshi renemshiba mapang Russia-isa Ukrainian power grid aser heating gas facilities nunga amak, ta Zelenskyy-i ashi.

Russia totzü aliba linüktem dang tariffs meshitsü amokmerenba dak sendakba nung Mongulbarnü Trump-i "kechi atalokdir repranga atati," ta ashi. Russia totzü aliba linüktem dang tariffs meshira China aser India dak kongshitsü.

"Asüng Russia den senden ka lir. Kechi atalokdir repranga atati. Nüngdakba mapang telemtetba agitsü," ta Trump-i ashi.

Tiri yimjak nung tariff jenjang tejangja ateta mali ta ashi.

Washington nung aliba Center for European Policy Analysis ajanga ashiba agi, Kremlin ya

NATO den rara tuluba akumtsü asoshi renemshir aser Russia anüolen alliance linüktem den mitkar tesendaktep yangluba tejangja ajiteter.

Putin-i China, North Korea aser Iran den Russia indang mitkar tesendaktep tali tashi itshia yanglua lir. Kasa mapang NATO-i Ukraine nem akhi ama Western weapons packages agütsüba nung yaritep tenzükogo, ta Mongulbarnü ashi. United States nungi belener aotsü sentongaliba hadir timba European allies aser Canada linüki alir. Trump administration-i Ukraine nem nok-nü kecha tenla magütsür.

Putin-i tang tashi atsü-anem akatsü indang kecha shia mali. Russia lenir aser Kremlin ketdangsür temi linük indang mitkar tashi aitba indang ang jembia arur.

Taoba hopta Putin-i sangdong ka nung, tang NATO air defense systems-i mesoittettsüsa Russia indang hypersonic missile tasen service nung aitogo, ta shia liasü.

Kasa mapang Russia indang taoba tir Dmitry Medvedev-i Ukraine rara yagi Russia aser US na rara tenzüksü akok ta tekumtangtsü ashi. Yangji telangzüba agüja Trump-i US nuclear submarines ana tesem melenshitsü totuyuba agütsü.

Witkoff-i Russia semdangtsü aliba ya Kremlin odongtar Dmitry Peskov-i Hombarnü pelashishia agizüka "Wiktoff den jembishinüba ya tongtipang, tajung aser nüngdak ta onoki züngshir," ta ashi.

Trump-i mezüngbo Moscow nem anogo 50 züngzüksü, saka Kremlin-i Ukraine yimtitem nung maneni amakba ajanga pai anogo züngzüksüba melenshi.

Trump-ia pai anogo züngzüksüba yagi temelenshi arutsü temulung melemi, Russia-i sanctions paidokba nung kanga junger ta kuli sayua lir, ta ashi.

February 2022 nungi par kidanger linük amakba ajanga alimai sanctions agütsüba ajanga tetsükdaktsü balaka ajuruba mali, ta Kremlin-i ashir.

Dr T Ao Trophy: Peren, Chumo, Zunheboto, Wokha & Dimapur nungeri takokangu

**Kohima, Luroi/August 5**

(TYO): Indira Gandhi Stadium, Kohima nung tang asaya aliba Dr. T. Ao Trophy 2025 inter-district football tournament nung Bodhbarnü Peren, Chümoukedima, Zunheboto, Wokha aser Dimapur district team temi pei tata asaya kokogo.

Bodhbarnü mezüngbuba asaya nung Peren-i asaya tanabuba shilem nung goal ana idakja Tseminyu goal 2-1 agi kokogo.

Tseminyu team-i asaya kanga junga tenzük aser minute 22buba nung Japhet Kath ajanga mezüngbuba goal idakja liasü. Ajisiüaka asaya tanabuba shilem nung Nrakhak-i minute 64buba nung Peren atema mezüngbuba goal idaktsü aser minute 70buba nung tanabuba goal idakja parnok i asaya akok.

Tanabuba asaya nung Zunheboto-i goal 3-0 agi Shamator kokogo.

Asaya tetenzük nungi goal idaktsüsi atema merangdanga asayaba sülen Zunheboto atema mezüngbuba goal Pulovi Kiho-i minute 30buba nung idaktsü aser iba sülen Vinato Achumi-i minute 38buba nung tanabuba aser Tokibe-i minute 60buba nung tasembuba goal idakja liasü.

Tasembuba asaya nung Wokha aser Phek na kanga toktepa asayar Wokha-i goal 3-2 agi kokogo.

Tenzük nungi Wokha team-i asaya amokbanger asayar Yisanbemo-i minute 19buba nung mezüngbuba goal idaktsü aser parnok goal ka agi tejakdang sür asaya mezüngbuba shilem tembang. Asaya tanabuba shilem nung Tsentselong-i minute 46buba

nung tanabuba aser Renjamo-i minute 57buba nung tasembuba goal idaktsü.

Ajisiüaka Phek-i bench nungi Veporayi anoka asayadaksü aser pai minute 65buba nung mezüngbuba goal idaktsü aser mapang apuloktsü asayaba mapang tanabuba goal idaktsü, ajisiüaka parnok asoshi menoatoker liasü.

Bodhbarnü tatembangbuba asaya nung Dimapur-i goal 3-0 agi Longleng kokogo.

Asaya nung Mangkholen, Rukuwe aser Zarenthung nungeri goal kaka idakja Dimapur team-i asaya koka liasü.

August 6 nü asaya:

Match 18 :

Shamator vs Tuensang @9am

Match 19:

Meluri vs Tseminyu @11am

Match 20 :

Zunheboto vs Niuland @1pm.

Canadian Open: Osaka aser Tauson na semifinals-i iogo

**Luroi/August 6, 2025**

(Agencies): WTA Canadian Open nung Bodhbarnü Naomi Osaka-i Elina Svitolina madak takok ngua semifinal tongtetogo.

Osaka-i iba asaya nung Ukraine tsürla ya 6-2, 6-2 agi ayong ayonga koka liasü. Tena tsüngda ghonda ka ser minute ter asaya liasü.

Semifinal nung la Clara Tauson den asayatsü shibai Australian Open champion Madison Keys 6-1, 6-4 agi kokogo.

"Ni jangradema asayadar aser idaki arutetba atema pelar," ta Osaka-i ashi.

"Ni asaya koker asünung ni US Open nungbo seeded

asayar asütsü. Iba ya kü nükjidong ka liasü aser ni kanga pelar," ta Grand Slam pezü koker alila yagi ashi.

"La kanga asaya tajang ka liasü. Ni la den taküm Auckland nung asayaogo. Ni yiruba ajanga asaya tom nung anentsüsa aküm. Ni tangbo anema lir asünung asaya atema yongya atar," ta Osaka-i la Tauson den asayaba indang ashi.

Tauson-i Bodhnarü takok ya tebou nem bendanga agütsü, shiba Deobarnü iba lima nungi pilaogo. La Grand Slam trok koker alila Iga Swiatek den asaya aliba mapang tebou ya asü.

"Anogo ana tejakdang tia

maka kübo asü, anungji ni pa atema tanü asaya kanga koknüa liasü," ta Tauson-i Keys akokba sülen ashi.

US Open atema renemshiba iba asayamung nung Tauson-i alizüng tasen ka tongteta top-10 nung aliba asaya ana; Swiatek aser Keys kokogo.

Tauson-i mezüngbuba set amokbanger asaya aser tanabuba set nunga Keys-i double fault menaba sülen la indang serve break süa asaya tenzük. Danish tsürla yagi la indang tanabuba serve nung point 19 nungi 12 ngua liasü.

Montreal nung top ten seed nungi top five aser seven asayar quarter-finals masüadang tsükba sülen tang Keys-a parnok rongnung denogo.

2021 küm Lyon aser Luxembourg Open aser taküm Auckland Open akokba sülen Tauson tang agi WTA title pezüububa abentsü merangdar.

Kasa mapang nunga Osaka-a WTA-level title tibuba abentsü merangdar, koba la tanur soa küm ka masayaba sülen mezüngbuba asayamung akokba asütsü. Lai tatemsa WTA-level title ka 2019 küm China Open nung koka lir.

MDFA Trophy October 14 nü nungi asayatsü

Dimapur, Luroi/August 6 (TYO): Mokokchung District Football Association (MDFA)-i sangdong ka ajanga MDFA Trophy, 2025 ya October 14, 2025 nü nungi tenzüka Imkongmeren Sports Complex, Mokokchung nung asayatsü ta metetdaksüogo.

Mokokchung district kübok aliba club team shirnokisa iba asayamung nung shilem agitsü jangrar parnok dang August 14 nü nungi tenzüka G-Sports, Alongmen Ward, Mokokchung Town nungi form agizüka benoktsü metetdaksüogo.

Kasa mapang nung MDFA nung züngoksema aliba club ajak dang club registration renew asütsü aser asayatem transfer asütsü asoshi September 30 nü tashi lapoktsüba metetdaksüogo. Atakzükja aliba mapang

süitemba sülen mapang talila süklöktsütsü atema mepeshiba kecha magizüktsü, ta kasa sangdong ajanga metetdaksü.

Asayamung nung shilem agitsü jangraba club temi form tem kanga junga filled-up sür October 2 nü tashi nungbo agütsütsü metetdaksüogo.

MDFA-isa, club ajak dang atakzükja aliba mapang aser guideline sülen tashi anga anidaktsü mepeshia metetdaksüogo, ajita asünungdang MDFA Trophy, 2025 ya kecha tetsükdaksü maka anep anepa ayongzükja asayatetsü, ta ashi.

Osang tejangjaba agitsü atema Bendangnukshi, V.P. Technical -9862466561 aser Imnayanger, Joint Secretary, Tournament - 9862636365 na den tongteprateptsü metetdaksüogo.

ICC Test Rankings: Siraj jenjang junga kümogo

**Luroi/August 6, 2025**

(Agencies): England den Oval nung Test pongububa asayaba mapang kanga junga asaya-a team takok dangi aniba sülen India nunger fast bowler Mohammed Siraj pa indang career nung tang jenjang tajungtiba tongteta 15buba nung lir.

Test pongububa nung Siraj-i run 190 agütsür wicket teku agi, kong tatembangbuba anogo kanga dang tongtibang wicket asem agiba densema liasü. Pa tang rankings nung jenjang 12 tejakdangi tuogo.

Siraj 2024 küm January ita jenjang 16buba tonga asayar liasü. India nungersa Prasad Krishna-a pa indang career nung jenjang tajungtiba tongteta tang 59buba nung lir. Tena ya India nunger bowler tem rongnungi Test asaya ka nung innings anaprongla nung wicket pezüzü mesür iba dak timba agiba tanabuba tarep lir, koba spinners Bishan Bedi aser

Erapalli Prasanna nati 1969 küm Delhi nung Australia den asayaba mapang ajangzükter liasü.

England nunger pace bowler tema jenjang memeshiogo. Gus Atkinson tang mezüngbuba top 10-i iogo aser Josh Tongue jenjang 14 tejakdangi tua tang 46buba nung lir. Tenapronglai Oval nung wicket ti-ti agia liasü.

Test bowling rankings nung New Zealand nunger bowler Matt Henry-i Zimbabwe den mezüngbuba Test asaya nung wicket teku agiba sülen pa tang pezüububa nung lir. Henry-isa pa indang career nung tang mezüngbuba rating points 800 ajangogo. Iba asaya ya NZ-i wicket 9 agi koka liasü.

Test batting rankings nung Joe Root maneni temaba jenjang nung lir. Harry Brook tang tanabuba jenjang nung lir aser India nunger opener Yashasvi Jaiswal pongububai tuogo. New Zealand nunger asayar Daryl Mitchell-a top 10-i iogo.

BILEMDANGANG

"Lendi aibelen dang nungibo asüngdangya asüba tajungba."